

অমৃত

আমাদের পোড়া দেশে চেনা গলিপথে
একলা সন্ধেবেলা কাঁচপোকা মেয়ে
ফুলে ফলে উড়ে যায় চাঁদিয়াল সুরে
ধূপধুনো চুম্বন ও কত কথকথা

আমাদের পোড়া দেশে চেনা ঝঞ্ঝাট
সরল ত্রিকোনমিতি মাদুরে বিছানো
পঞ্চদশী জ্যোৎস্নায় ভেজে লাস্ট ট্রেন
নীলাভ ওড়নাটিতে রোদ লেগে আছে

আমাদের পোড়া দেশে চেনাশোনা মুখ
বেহায়া হাওয়ার মত পায়ে পায়ে আসে
এড়াতে পারি না বলে কাছে টেনে রাখি
নারীর কোলের চেয়েও নরম আদরে

স্বপ্ন রেখেছো সখী কোন পেয়ালাতে?
গরলে অমৃতসুখ ঢালো পোড়াদেশে

২৪শে জুলাই, ২০০৬